

strieri a cavallo, e provisionati bon numero; e cussi a Retimo e la Cania, et presto, e bon numero di bombarde di reparo, e passavolanti, polvere, bombardieri etc. Et li oratori electi refudono, per la pocha provisiom di ducati 200 in 6 mexi; ozi reduti li zenthilomeni, per farne di altri, li voleva dar ducati 250; non è stati in acordo, o hanno fato. Non bisogna aspetar l'horo aricordi, e temeno la spesa.

*Del ditto, di 5 septembrio.* Zercha sier Francesco Zigogna, da la Cania, li à scritto di Coron eravi homeni da fati 5000 etc., et à dato il turcho casali a' coronei etc., adeo più à spaventà tutti, è de' mali animi; pur tutti stano quieti, spera in Dio. *Item*, do man di oratori hano refudato; e, cresuto il salario ducati 300 per quella ambasata, *iterum* electi sier Domenego Venier e sier Beneto Barbarigo, hanno acceptado. Si partirà per tuto il mese; sono zenthilomeni da conto, et apresiati universalmente per tutti.

*Letera de i nobeli, et nobeli de Crede, et pheudati, et la università, data a dì ultimo avosto.* Come, inteso la miserabel et lacrimabel excidio di Modom, e di Coron haversi dato al turco, e l'armata andata a Napoli, e di la nostra non sanno dove la sij; stanno molto atoniti, considerando li pericoli inminenti dil stado di la Signoria nostra; pur sempre l'horo sono obedienti a li rectori, e cussi farano; e si à trato de li homeni assaissimi, munition, artilarie, arme e armature; et di la creation di do l'horo oratori, che con ogni celebrità verano qui per exponer li capitoli li sarano commessi. E per questo bregantin avisa, bisognarli ingegneri, bombardieri, stratioti e altri soldati e pratici, per ajuto contra i nimici extrinseci, e per refrenar li pravi pensieri e volontà forsi de alcuni ignoranti etc. *Item*, bombarde di reparo, balestre, archi, spade, targe e altre artilarie, polvere di bombarda, vituarie, formenti sopra tutto. Laudano li rectori, e a vostra celsitudine questa amaricata università se ricomanda.

368 *Di Alexandria, di sier Hironimo Tiepolo, consolo, di 21 luo.* Come scrisse, di 4, di la creatiom dil soldan Zuam Belat, era armirao grande, con el favor dil diodar grande, fo quello amazò il soldaneto, e hano hora dal Chaiero havea principià dar la paga a li mamaluchi, *videlicet* ducati 100 per zilebo, ducati 50 per chornas, ducati 30 per sesi; da poi, hauta la paga, farano nove mutation, per esser questo soldan homo scandoloso e mal voluto zeneralmente da tutti; è in fama el soradito diodar, qual ministra il tutto e ogni cossa li passa per man. El soldam cazado, non si sa si l' sia seoso al Caiero, o

dove el sia fuzito. Il signor di Damasco, per quanto s' intende, si impoterà di tuto el paexe di Gazara in là, nè vol dar ubidentia al soldan. *Item*, eri sera, conduto de li in Alexandria prexom quel armirao, vene per i ferieri da Rodi, che era favorito del soldam cazado, nè altro è successo etc. *Item*, a dì 23, scrive haver auto di 20 dal Chaiero, di Domenego del Capello, una letera. Li scrive, in quella hora el signor turziman è venuto di castello, e lo à mandà a chiamar, e li disse scrivesse a esso consolo, come el soldan, fo descazado, è stà trovado e preso eri, et vien mandato in Alexandria confinado; el conduse un armirao di lanze 1000, à nome Osdomer, e vien con comandamento dil signor soldam, che lui consolo e merchadanti li debi pagar el tributo di Cypro, dal tempo non è stà pagato in qua; et non volendo pagar, lo meti in cadena esso consolo con tutti i merchadanti, e non lo potendo haver per questa via, à dito in secreto al ditto armirao, debi far scriver una carta adosso esso consolo e tutti i merchadanti, che se in termine di tanto tempo non li sarà portà el tributo, esso consolo e tutti i merchadanti siano ubligati a pagar el ditto tributo; et è stà causa dil ditto comandamento el chadi Chatibiser; e li scrive il turziman li à ditto fazi bona ciera al ditto armirao et apresentarli.

*Del ditto consolo, di 25 luo.* Manda uno aviso di 21, abuto dal Chaiero dal predito Domenego del Capello, come quel zorno il turziman montò in castello, e fo a parlamento con el soldam, e dice averli ditto: Signor, non è possibile tu possi cavar un ducato da' venetiani, prima per non meter tal uxanza, *etiam* per non se atrovar la natiom un duchato. Et che 'l cao Chatibiser rispose: Tu, turziman de' franchi, non puostu far trovar al signor soldan ducati 25 in 30 milia? E che lui havea fato trovar al signor soldam ducati 400 milia d'oro, e che 'l soldan concluduse, esso consolo nostro habi a donar al ditto Osdomer, venuto de li, ducati 1000, per la soa venuta. *Item*, el soldan solicitando il tributo, esso consolo à mandà homo a posta con la nave di Vicenzo Horso in Cypro per il tributo; lo mandi quel rezimento prestissimo, e lo mandi con la ditta nave, non havendo altro pasazo in dextra. Noto, l' homo mandato in Cypro fu Andrea Canfon.

In questo pregadi, fu posto per nui savij ai ordeni una parte molto longa, zercha la regulation di le galie sono fuora, e quelle qui, acciò vadino al viazo. Assa' capitoli, non li scrivo; e dil partir fin 6 zorni al tutto. Ave tutto il conseio.

*Item*, fono stridati alcuni debitori, admonendoli, 368